

Suliffeqarfinnit eqqakkanut Qeqqata Kommuniata maleruaqqusaa

Avatangiisit innarlitsaaliorneqarnissaanik Inatsisartut inatsisaat nr. 9, 22. november 2011-meersumi, Inatsisartut inatsisaat nr. 16, 1. december 2021-meersumi allanngortinneqartumi § 36, imm. 3, § 39, imm. 1 aamma § 66, imm. 3 kiisalu Eqqakkat pillugit Namminersorlutik Oqartussat nalunaarutaat nr. 3, 7. januar 2021-meersumi §§ 18-20 naapertorlugit aalajangersarneqarput:

Kapitali 1

Atuuffeqarfia

§ 1. Maleruaqqusami matumani Qeqqata Kommuniani suliffeqarfinni tamani eqqakkanik katersisarnermut aaqqiissutitut, innersuussinissamut aaqqiissutitut aammalu tigussaasumik innersuussinermut malittarisassanik aalajangersaavoq.

Kapitali 2

Siunertaa nassuiaatillu

§ 2. Torersumik eqqakkanik immikkoortiterinissap, mingutsitsinninnissap aammalu mingutsitsinerit pinngitsoortsinnissaat kiisalu eqqakkanik atoqqiisoqarnissap aamma atoqqinneqarnissaannik siuarsaanissap qulakkeernissaa maleruaqqusatigut siunertaavoq.

§ 3. Eqqakkat pillugit Namminersorlutik Oqartussat nalunaarutaanni qaqugukkulluunniit atuuttumi nassuiaatit maleruaqqusani matumani atuuppoq.

Kapitali 3

Eqqagassaqaalersitsisup pisussaaffii

Atuisussaatitaaneq

§ 4. Eqqakkanik katersisarnermut aammalu innersuussinissamut aaqqiissutitut aalajangersakkanik atuinnissamut eqqagassaqaalersitsisoq pisussaaffeqarpoq.

Imm. 2. Eqqakkat maleruaqqusani allaaserineqanngitsut eqqarsaatigalugit eqqagassaqaalersitsisoq kommunalbestyrelsimut saaffiginnissuteqassaaq, taakkulu eqqakkat iginneqarnissaannut erseqqissumik innersuussuteqassallutik. Eqqagassaqaalersitsisup eqqakkat iginneqarnissaannut innersuussutaasut atussavai tamatumunngalu atatillugu aningaasartuutit matussusernissaannut kommunip akigititatut aalajangersagai akilertassallugit.

Imm. 3. Eqqagassalerinermut aaqqiissut naapertorlugu eqqakkat immikkoortunut eqqortumik iginneqareernerisa kingorna, eqqagassaqaalersitsisoq akisussaajunnaassaaq.

Imm. 4. Suliffeqarfiup nammineerluni eqqakkat navianartut avatangiisinut illersorsinnaasumik aqussinnaallugit qularnaarsinnaappagu, suliffeqarfiup qinnuteqarnerata kingorna, Kommunalbestyrelsi suliffeqarfiup atuisussaaitaaneramik pisussaajunnaarsitsinermik nalunaaruteqarsinnaavoq.

Immikkoortiterisussaaitaaneq

§ 5. Eqqagassaqaalersitsisup eqqakkat immikkoortuni katersisarnermut aammalu innersuussinissamut aaqqiissutini allaaserineqartut naapertorlugit immikkoortitissavai.

Imm. 2. Eqqagassaqaalersitsisup qulakkiissavaa, suliffeqarfimmit eqqagassat immikkoortut pilersinneqartut tamaasa katersuiveqartinneqarnissaat.

Nalunaartarnissamut pisussaaffeqarneq

§ 6. Eqqagassaqaalersitsisoq eqqagassanik tunniussinermi eqqagassat assigiinngitsut tamaasa nalunaarsussavai.

Imm. 2. Eqqagassaqaalersitsisoq kommunip eqqakkanut nalunaarsuiffiani nalunaarsortissimassaaq kommunillu tigooraavianut oqimaalutaasussamut imaluunniit akiligassap allagartaanik suliarinninnissaq siunertaralugu annertussutsinik tunniunneqartunik nalunaarsuisussamut tunniussinermi saaffiginnissaaq.

Nalunaaruteqartarnissamut paasissutissiisarnissamullu pisussaaffiit

§ 7. Eqqagassaqaalersitsisut kommunalbestyrelsip peqqusineratigut matumani malittarisassat naapertorlugit eqqagassat iginneqarnerini suuneri pillugit paasissutissiisussaaitaapput.

Imm. 2. Kommunalbestyrelsi eqqagassaqaalersitsisumik akiliisitsinissamut pisinnaatitaaffeqarpoq kiisalu eqqakkat katitigaaneri pillugit, kommunalbestyrelsi eqqakkanik avatangiisitigut isumannaatsumik isumaginninnissaanik qulakkeerinninnissaanut pisariaqartunik paasissutissanik piumaffiginnissinnaalluni.

Imm. 3. Eqqakkat annertussusaat, katitigaanerat iginneqariaasiallu pillugit missiliutip paasissutissaannik kommunalbestyrelsip piumasaqarneratigut eqqagassaqaalersitsisoq paasissutissiinissaminut pisussaavoq.

Nalunaarutiginnittussaaitaaneq

§ 8. Eqqagassaqaalersitsisoq eqqakkat mingutsitsinermik kinguneqartussat tamaasa pillugit pissutsini tamani kommunalbestyrelsimut nalunaarutiginnittuussaaitaavoq.

Imm. 2. Sapaatip akunneranut eqqagassat annertussusaat sanaartornermi eqqakkanit 50 kubikmeterit qaangerneqarpata, nutaamik sanaartornermut, allanngortitsinermut, nutarterinermut isaterinernullu atatillugu eqqagassat kommunip eqqakkanik tigooraavianut nalunaarutigineqassapput. Piffissami sanaartorfiusumi tamarmi sanaartornermut pilersaarusiornermi eqqakkat annertussusissaat 100 kubikmeterit qaangerneqarpata, sapaatip akunneranut eqqagassat qanorluunniit annertutigissagalarpata, kommunip eqqakkanut tigooraavianut nalunaarutigineqassapput.

Imm. 3. Nunaqarfinni nutaamik sanaartornermut, allanngortitsinermut, nutarsaanermut ingutserinernullu atatillugu eqqagassat pilersinneqartartut, qanorluunniit annertussuseqartigigalarpata kommunip eqqakkanik tigooraavianut nalunaarutigineqartassapput.

Imm. 4. Eqqagassaqalersitsisut eqqakkanik navianartunik pilersitsisartut erseqqissumik innersuunneqarnissaannut tunngatillugu kommunalbestyrelsimut nalunaarutiginnissapput. Nalunaaruteqamermi eqqakkat suussusaat, poortuutit suussusaat ukiumullu annertussutsit naatsorsuutigineqartut paasissutissiissutigineqassapput. Kommunip avataanit immikkoortortanit eqqakkat navianartut eqqunneqassappata, tamanna sapaatip akunneri arfineq-pingasut sioqqullugit nalunaarutigineqassapput.

Toqqortarinnittussaatitaaneq

§ 9. Eqqakkat isumannaatsumik, immikkoortillugit matoqqatillugillu toqqortarinnissaannut kiisalu eqqaaviit eqqiluisaarnissaannut eqqagassaqalersitsisoq pisussaaffeqarpoq.

Imm. 2. Eqqakkat toqqortatigineqartut, matumani eqqakkat mingutsitsisut, eqqiluutsuutitsinngitsut, tipittut assigisaannilluunniit pisut ilanngullugit, erngertumik peerneqarnissaannut kommunalbestyrelsi peqqussuteqarsinnaavoq.

Eqqiluisaartitsisussaatitaaneq

§ 10. Sumiiffinni inuit namminerisamik atugaanni imaluunniit tamanit tикиnneqarsinnaasuni eqqakkanik inissiisoqassanngilaq imaluunniit igitsisoqassanngilaq.

Imm. 2. Pisiniarfinni, neriniartarfinni, imerniartarfinni, niivertarfeeqqani assigisaanilu nerisassanik imeruersaatinillu tuniniaaffiusuni eqqagassaqalersitsisoq eqqaavilersuissaaq, eqqaaviillu pisariaqartitsinikkut imaarneqartassallutik kiisalu nunaminertani atugassinneqartuni tuniniaanerup kingunerisaanik eqqakkanit torersuutinneqarnissaat isumagisarissallugu.

Eqqakkanik assartuineq

§ 11. Eqqagassalerineq pillugu nalunaarut naapertorlugu eqqakkanik assartuisartuq eqqakkanik assartuinissaminik kommunalbestyrelsimut nalunaaruteqassaaq.

Imm. 2. Eqqakkanik assartuinerup maanaannartitsinngitsumik peqqinnissamut avatangiisitigullu imminut illersorsinnaasumik ingerlanneqarnissaa eqqakkanik assartuisartumit qulakkeerneqassaaq.

Imm. 3. Eqqakkanik assartuinnermi maangaannartitsisoqarpat eqqakkanik assartuisartumit maangaannartissimasat katersorneqassapput. Mingutsitsisoqarpat tamanna erngetumik salineqassaaq kommunalbestyrelsilu pisumik nalunaarfigineqarluni.

Kapitali 4

Aaqqissuussinerit assigiinngitsut

Piomasagaatit nalinginnaasut

§ 12. Aaqqiissutaasuni immikkoortunut aalajangersakkat naapertorlugit eqqagassat immikkoortut iginneqareeraangata aatsaat eqqagassaqaalersitsisup akisussaanera atorunnaarsinneqassaaq. Kommunalbestyrelsimut siumut isumaqatigiissuteqarnikkut eqqagassat annertussusissaat sinnerneqarsinnaavoq

Imm. 2. Kommunimi sulisunut imaluunniit allamit ingerlatsisumut eqqagassanik tiguisumut eqqakkat annertussusaat imaluunniit suussusaat isumaginninnissamut imaluunniit suliffimmi avatangiisinut ajornartorsiortitsippata, igitsinissamut periarfissamut allamut innersuussinissamut imaluunniit aggorneqarlutik, poortorneqarlutik assingusumilluunniit suliarineqaqqaarnissaannik piomasagaateqarnissamut kommunalbestyrelsi pisinnaatitaavoq.

Imm. 3. Nunap timaani eqqagassat pilersinneqartut illoqarfimmut imaluunniit nunaqarfimmut assartorneqassapput aaqqiissutaasunilu immikkoortunut aalajangersakkat naapertorlugit tunniunneqassallutik.

Imm. 4. Eqqakkanik maaniinnaq ikuallaaneq inerteqqutaavoq.

Imm. 5. Nunaqarfimmut ataasiakkaanut erseqqissumik allatut innersuussisoqarsimanngippat, katersisarnermut aammalu innersuussinissamut aaqqiissutitut nassuiarneqartunut nunaqarfiit aallaavittut ilaapput.

Katersinnermi aaqqissuussinerit

§ 13. Katersisarnermut aaqqissuussinnermi kommunalbestyrelsimit innersuunneqartumut tunniussivimmut imaluunniit katersuivimmut eqqagassaqaalersitsisup eqqagassaatininik igitsinera pineqarpoq. Tamatuma kingorna eqqakkanik isumageqqiinissamut akisussaaffik kommunalbestyrelsimit tiguneqassaaq.

Imm. 2. Katersisarnermut aaqqiissutip ingerlanneqarnissaa suliffeqarfimmut namminersortumut, igitsereerinnermi eqqakkat suliareqqinnissaannik akisussaaffimmik tigusiutigisussamut suliariumannittussarsiuunneqarsinnaavoq. Inatsit atuuttoq naapertorlugu pisuni eqqagassat iginneqarnersut kommunalbestyrelsimit nakkutigineqassapput.

Innersuussinermi aaqqissuussinert

§ 14. Innersuussinermi aaqqissuussinerni kommunip tigooraaviani, ataatsimoorussamik kommunit eqqagassalerinermik ingerlatsiviani imaluunniit ingerlatsisumit allamit kommunip isumaqatigiissuteqarfigisaanit maleruagassami innersuussinert naapertorlugit eqqakkat iginneqarnissaat eqqagassaqaalersitsisup akisussaaffigaa.

Imm. 2. Niooqqaanissamut innersuussuteqartup innersuussutigisaa qaqugukkulluunniit eqqagassaqaalersitsisumit malinneqassaaq.

Imm. 3. Eqqakkat kukkusumik immikkoortitikkat piumasagaatinik naammassinninngitsut imaluunniit maleruagassami matumani aalajangersakkanik allatigut malinninngitsut itigartitsissutigineqarsinnaapput.

Ersarissumik innersuussineq

§ 15. Eqqagassat katersisarnermut innersuussisarnermullu aaqqissuussinernut atuutereersunut ilaangippata eqqagassaqaalersitsisoq kommunalbestyrelsimut, igitsinissamut periarfissamut ersarissumut innersuussisussamut saffiginnissaaq.

Umiarsualivinni tigooraaviit

§ 16. Maleruagassami matumani aaqqiissutit naapertorlugit, umiarsualivinnut peqatigiinnit ingerlanneqartunut peqatigiit eqqagassaqaalersitsisusarput, taamaalillutillu umiarsuarnit, atortulersuutinit qillerivilianiillu eqqagassanik tigooraavimmik pilersitsisussaataapput.

Imm. 2. Imm. 1 naapertorlugu eqqakkanik tigooraanermi, umiarsuarnit, atortulersuutinit imaluunniit qillerivilianit ataasiakkaanit eqqagassaqaalersitsisutut akisussaaffimmik ingerlatsivik tigusissaaq. Tamatuma kingorna eqqagassaqaalersitsisunut piumasagaatit atuuttut naapertorlugit eqqakkat tiguneqarsimasut kommunip eqqakkanik tigooraavianut imaluunniit kommunit ataatsimoorussamik eqqagassalerinermik ingerlatsivianut ingerlateqqinneqarnissaannik ingerlatsivimmit qulakkeerneqassaaq.

§ 17. Maleruagassami matumani aaqqiissutit naapertorlugit, umiarsualivinnut pisortanit ingerlanneqartunut umiarsualiveqarnermut oqartussat kommunalbestyrelsimut isumaqatigiissuteqarnikkut umiarsuarnit, atortulersuutinit qillerivilianiillu eqqagassanik tigooraavimmik pisariaqartinneqartumik pilersitsisussaapput, immikkoortiterisimanissamullu piumasagaatinik malinnittoqarsimaneranik nakkutiginnissallutik.

Imm. 2. Pisumi matumani eqqagassaqaalersitsisoq tassaavoq umiarsuit, atortulersuutit imaluunniit qilleriviliat ataasiakkaat umiarsualivimmi eqqagassaminnik igitsisut, taakkulu akigititat allattorsimaffiat atuuttoq naapertorlugu eqqagassanut akigititat akilersinneqartassallutik.

Imm. 3. Eqqakkat kommunip ataatsimut ikuallaavianut iginneqassasut kommunalbestyrelsimut innersuussutigineqarsinnaavoq.

Kapitali 5

Katersisarnermut aaqqiissummut eqqagassat immikkoortut ilaapput

Eqqakkat uumasuneersut

§ 18. Eqqakkat immikkoortunut eqqakkat uumasuneersut, tassa qimmit uumasullu minnerit allat kiisalu pisanit sinnit, soorlu puisimit, arfermit aavermiillu, aalisakkanit aammalu tuttunit umimmannilluunniit eqqagassat ilaapput.

Imm. 2. Eqqaavinnut containeriusunut tamanut atugassanngortinneqarsimasunut imaluunniit kommunip tigooraavianut eqqagassaqaalersitsisoq eqqagassanik igitsissaaq. Eqqakkat pisanut puussiarsuarnut, anartarfilerinermi puussianut imaluunniit eqqagassaasivimmut ussisumut poortorneqareersimassapput.

Eqqakkat nalinginnaasut

§ 19. Eqqakkat nalinginnaasut tassaapput, illoqutigiinni eqqakkat nalinginnaasut kiserngoruttut soorlu igaffimmi eqqakkat, nerisakut, pappiliakut, plastikkit poortuutikullu, eqqiluisaarnermi eqqakkat soorlu nangit kiisalu piniarnermit aalisarnermillu nammineq atukkanit eqqakkat. Eqqakkanut nalinginnaasunut ilaatigut igalaamerngit, savimerngit batteriillu ilaanngillat.

Imm. 2. Eqqakkanut nalinginnaasunut aaqqiissummut imaartittarnissamut amerlassusissanik pisariaqartinneqartunik nalunaarsorneqarnissaaq eqqagassaqaalersitsisumit qularnaarneqassaaq, taamaaliornikkut imaarneqarnerit marluk akornanni eqqaaviit ulikkaartoortassanatik. Imaartittarnissamut nalunaarsorneqarneq atorunnaarsitsinerlu kommunip nittartagaatigut, innuttaasunik kiffartuussivikkut imaluunniit immikkoortortani allaffimmut ingerlanneqassaaq.

Imm. 3. INI-mut attartornermut ilaatinneqartoq eqqarsaatigalugu INI-p, kommunip aamma Namminersorlutik Oqartussat akornanni sullissinissamut isumaqatigiissutaat qaqugukkulluunniit atuuttoq naapertorlugu eqqiluitsuutitsinissamut pisussaaffik aalajangersarneqarpoq.

§ 20. Eqqagassaqaalersitsisoq nammineq eqqakkanut nalinginnaasunut naammattunik eqqaavinnik pissarsissaaq, inissiinissamut aserfallatsaaliinissamullu pisussaaffeqarlunittaaq. Eqqagassaqaalersitsisoq tamatumunnga atatillugu aningaasartuutit nammineq akilertassavai.

Imm. 2. Eqqaavinnut, puussiarsuarnut imaluunniit eqqaavinnut containeriusunut tullinnguuttut atuupput:

- 1) eqqakkat peerneqarnissaannut taamaallaat atorineqassaaq,
- 2) atortunik inngigissunik ipitsunilluunniit poortorsimanngitsunik imaqassanngillat,
- 3) eqqaavik akornutitaqanngitsumik ammarlugu imaarneqarsinnaasussaavoq,
- 4) angallattunut imaluunniit aputaajaanermut akornutaatinnagu inissisimassaaq,

- 5) eqqaavilerisut biiliinut ungasissuseq 50 m.-mik ungasissuseqassalluni kiisalu aqqutaa tamaat sinnerlugu minnerpaamik 2,5 m.-mik portussusilimmik akornutitaqassanani,
- 6) ukioq naallugu aqqusinnermi appakaaffissami ingerlavigineqarsinnaasumut manissumullu inissinneqassasoq,
- 7) tipinik akornusersuinissaa minnerpaaffissaaniitinniarlugu inissinneqassasoq,
- 8) eqqaaviup inissisimaffiata eqqaa eqqiluutsuutinneqassaaq.

§ 21. Eqqakkat nalinginnaasut sapaatip akunneranut ikinnerpaamik ataasiarlugit imaarneqartassapput aamma akulikissusaa eqqarsaatigalugu tipinneranik akornusersuinissaa minnerpaaffianiititsissalluni. Sapaatip akunneranut imaartittarnerup amerlinissaanut imaluunniit eqqaaviliussat ilaqqinnissaannut nalunaarutiginnissaannullu kommunalbestyrelsi piumasaqarsinnaavoq.

Imm. 2. Suliffeqarfik imaluunniit paaqqinnittarfik eqqakkanut nalinginnaasunut ilanngussimanngitsoq naak pisussaaffigaluartoq, aaqqiisummut ilanngutissasoq kommunalbestyrelsimit aalajangiunneqarsinnaavoq.

Imm. 3. Sisimiuni eqqakkat nalinginnaasut kommunip ataatsimut ikuallaavianut toqqaannartumik igikkiartorneqassapput. Maniitsumi, Kangaamiuni, Atammimmi, Napasumi, Kangerlussuarmi, Sarfannguani aamma Itillimi eqqakkat nalinginnaasut kommunip tigooraavianut igikkiartorneqassapput.

Allunaasaq pituutarlu

§ 22. Allunaasaq pituutarlu atortussianik akoorlugu imaluunniit akoornagu suliat eqqakkat immikkoortunut ilaapput.

Imm. 2. Eqqagassaqalersitsisoq eqqakkanik immikkoortunik kommunip tigooraavianut imaluunniit umiarsualivimmi containerinut inissinneqarsimasunut igitsissaaq<. Allunaasat pituutallu 2 meterit sinnerlugit takissusillit tunniunneqannginnerani ammaloqiusanngorlugit imuneqaaqaassapput.

Qalorsuit, qassutit aamma ningittakkat

§ 23. Eqqakkat immikkoortuni ilaatigut aalisakkanut qassutit, qassutit, ningittakkat qalorsuillu ilaapput.

Imm. 2. Puttaqutillit, kallussaannaveeqqutit, oqimaaluttat allunaasallu akuerineqarsinnaapput, aatsaat qassutini/ningittakkani/qalorsuarni/nettinilu aalajangersagaasimappata.

Imm. 3. Qalorsuit, qassutit ningittakkallu immikkoortiterlugit kommunip tigooraavianut imaluunniit umiarsualivimmi containerinut inissinneqarsimasunut eqqagassaqalersitsisoq igitsissaaq, igitsinnginnermilu oqummersat ass. peersimanissaat qulakkiissallugu.

Kapitali 6

Eqqakkat immikkoortut inniminniinermut aaqqiisummut ilaapput

Imassat aamma sakkut

§ 24. Imassat, aallaasit, qummoroortut, ajunaalerluni kalerrisaarutit qamutillit imassa at suugaluarpataluunniit eqqakkat immikkoortunut ilaapput.

Imm. 2. Siumut nalunaarutigereerneratigut eqqakkat immikkoortut kommunip tigooraavianut eqqagassaqaalersitsisumit iginneqassapput. Imassat, aallaasit, qamutillit il. il. atorsinnaasut politiinut tunniunneqassapput.

Betonngi aamma qarmakkat

§ 25. Betonngimit eqqakkanut betonngi saviminernik qajannaallisaataanik anillangasortaqaanngitsut qarmakkallu tassaasut ass. qarmasissiat, marraat aamma multipladit ilaapput.

Imm. 2. Betonngit saviminernik qajannaallisaataasa annerpaamik 2 cm.-imik anillanganerat, betonngit eqqakkat annerpaamik 2 meterimik annertussusilerlugit aserorterneqarsimanissaat kiisalu PCB-mik imaqaarnerat 0,1 mg./kg.-mit annikinnerunissaa siumut qulakkeeqqaarlugu, eqqakkat immikkoortut kommunip tigooraavianut eqqagassaqaalersitsisoq igitsissaaq.

Eqqakkat toqqorneqarsinnaasut akuleriit

§ 26. Eqqagassat immikkoortunut allanut ilaanngitsut eqqakkat immikkoortunut ilaapput, ilaatigut marraasinnaapput, marriat, vinylit, tarrarsuutit flise-llu.

Imm. 2. Eqqagassat annerpaamik 2 meterimik annertussusilerlugit aserorterneqarsimanissaat siumut eqqagassaqaalersitsisumit qulakkeerneqariarlutik, kommunip tigooraavianut eqqakkat immikkoortut igissavai.

Eqqagassat ikuallassinnaasut

§ 27. Eqqagassat ikuallatassat tassaapput eqqagassat ikuallassinnaasut, immikkoortiterneqartariaqaanngitsut, toqqortarineqarnissaannut imaluunniit immikkut isumagineqarnissaannut piumasaqaataasumut ilaanngitsut aammalu toqqaannartumik atoqqiinissamut naleqqutinngitsut. Ilaatigut puukut, plastikkit pequtillu aseqqukut pineqarput.

Imm. 2. Eqqagassaqaalersitsisup eqqakkat ikuallatassat kommunip tigooraavianut igissavai, aamma eqqakkat tunniunnerini imerpalasortaqaassanngillat imaluunniit takissusaat 1,5 meterit qaangissanngilaat.

Imm. 3. Kommunalbestyrelsi kommunip ataatsimut ikuallaavianut sequtserivummut piumasaqarluni innersuussutitalimmik eqqakkat tunniunneqartassasut innersuussuteqarsinnaavoq.

Sanaartornermi atortut

§ 28. Sanaartornermi atortut eqqagassat nutarterinermi, nutaamik sanaartornermit imaluunniit ingutserinermi pisuupput, ilaatigut qalissiaasinnaallutik, gipsiusinnaallutik imaluunniit kiffiutaasinnaallutik.

Imm. 2. Sanaartornermi atortut eqqagassaqalersitsisumit kommunip tigooraavianut iginneqassapput, iginneqannginnerinilu assersuutigalugu kikissat qinnerillu piiarneqarsimanissaat qulakkeersimassallugu.

Toqqaannartumik atoqqiineq

§ 29. Toqqaannartumik atoqqiinerit tassaapput pequtit atugassat, pequtit assigisaallu suliareqqinneqaaqqaaratik atorineqarsinnaasut.

Imm. 2. Pequtit atoqqinneqarsinnaasut kommunip tigooraavianut imaluunniit toqqaannartumik atoqqinneqarsinnaasunut tamanit tikkineqarsinnaasunut containerinut eqqagassaqalersitsisumit peerneqassapput.

Assakaasut

§ 30. Assakaasukut tassaapput assakaasut qalequtai ilivitsut imaluunniit ilaannakui angallassissutinit assakaasulinnit tamaneersut.

Imm. 2. Assakaasukut kommunip tigooraavianut imaluunniit kommunip isumaqatigiissuteqarfigisaanut ingerlatsisumut allamut eqqagassaqalersitsisumit tunniunneqassapput, tunniussinnginnermilu assakaasut saviminertaasa peerneqarsimanissaat qulakkeersimassallugu.

Eqqakkat navianartut

§ 31. Eqqakkat navianartut tassaasinnaapput akoorutissat, uuliakoq, pære sarfamik sipaarutalik, akkumulatorit, lysstofrøri, qalipaait sinnikui, batteriit, avatangiisinut ulorianartunik eqqagassanut poorinikuusimasat, qarasaasiat, printerit, isiginnaarut, oqarasuaatit, sannatit innaallagiatortut, pinngussat elektronikkisut, igaffimmi errorsisarfimmilu atortorissaarutit, qisuk aanaveersaasigaq, eqqagassat asbestinik akullit, eqqagassat PCB-mik akullit aammalu eqqagassat aatsitassanik oqimaatsunik akullit

Imm. 2. Eqqagassat asbestinik, PCB-mik aatsitassanillu oqimaatsunik akullit kapitali 7-imi tulluuttumi nassuiarneqartutut ersarissumik innersuussinermik aaqqiissummut ilaapput.

Imm. 3. Eqqagassat navianartut kommunip tigooraavianut eqqagassaqalersitsisumit tunniunneqassapput, tunniunneqannginnerinilu tulluuttutigut immikkoortinneqarnissai qulakkiissallugu:

- 1) Elektronikkitt eqqagassat.
- 2) Igaffimmi errorsisarfimmilu atortut
- 3) Kemikaaliat
- 4) Qalipaait, lakkit, limit, fugemasset naqiterinermilu qalipaait.
- 5) Uuliakoq, tassa uuliakoq sunaluunniit
- 6) Akkumulatorit aamma batteriit.
- 7) Poorisat silaannarmik naqitsinermik imallit.
- 8) Qisuk aanaveersaasigaq.

Imm. 4. Pisuni tamani eqqagassaqaalersitsisup eqqagassat navianartut tulluuttutigit poortorsimanissaat qulakkiissavaa:

- 1) puut eqqiluutsut, ussittut matoqqasullu,
- 2) pooreqqaarisaa imaluunniit imarisaanik ersarissumik nalunaaqutsersimasoq, imaluunniit
- 3) eqqagassanut navianaatilinnut assigiinngitsunut assigiinngitsunik pooqartitsineq.

Imm. 5. Nunaqarfinni eqqagassat avatangiisinut navianaatilinnik aallertoqarnissaanik isumaqatiginninniarluni imaluunniit kommunip tigooraaviani immikkoortiterneqarnissaanut eqqagassaqaalersitsisoq vejformandimut attaviginnissinnaavoq.

Igalaaminikut

§ 32. Igalaaminikuni igalaamerngit puutut atorpeqarsimasut pineqarput, matumani viinnit puuiaasat, paarnat simersiat puui, nerisassanit assigiinngitsunit puut igalaamerngit, igalaamerngit aseqqukut assigisaallu kiisalu pequtit annertunerusut soorlu tarrarsuutit, nerriviit igalaaminusut igalaallu igalasserfeqanngitsut ilaallutik.

Imm. 2. Eqqagassat kommunip tigooraavianut eqqagassaqaalersitsisumit tunniunneqassapput.

Saviminikut saffiugassakullu

§ 33. Saviminikut saffiugassakullu ilaatigut tassaapput sikkilip timitaa, ilisiviit saffiugassanit sanaat, ruujorit imaluunniit inuussutissarsiornermik sanaartornermit, ingutserinermi imaluunniit nutarterinermi savimerngit saffiugassallu kiisalu puukut soorlu qillertuusat, immiaaqqat sodavandillu qillertuusat ilaapput.

Imm. 2. Saviminikut saffiugassakullu kommunip tigooraavianut imaluunniit kommunip isumaqatigiissuteqarfigisimasaanut ingerlatsisumut allamut eqqagassaqaalersitsisumit tunniunneqassapput. Tunniussinnginnermi eqqagassat aserorterneqarsimanissaannut annertunerusumik tigooraavimmi piumasaqaateqartoqarsinnaavoq.

Eqqakkat angisuut

§ 34. Eqqakkat angisuut immikkoortuni pisattat annertunerusut pineqarput, assersuutigalugu allaffimmi pequtit, sikkilit, savimerngit, saffiugassat, dunkit, madrassit kiisalu igaffimmi

errorsisarfirmilu atortut tassaasut nillartaatsiviit, qerititsiviit, kissarsuutit, errorsiviit, erruiviit, microbølgeovnit il.il.

Imm. 2. Eqqakkat angisuut kommunip tigooraavianut eqqagassaqalersitsisumit tunniunneqassapput.

Qisuit igitat

§ 35. Qisuit igitat ilaatigut tassaapput sallilikkat issusuit, sallilikkat, quassuttuut, pladit imaluunniit listit qalipaannakkat imaluunniit qaaginnaasigut suliarisat, aamma sanaqqitatut imaluunniit atoqqitassatut atorneqaqqissinnaanngitsut.

Imm. 2. Qisuit naqitat eqqakkat navianartunut ilaatinneqarput, takuuk § 31, imm. 3, nr. 8.

Imm. 3. Qisuit eqqagassat kommunip tigooraavianut eqqagassaqalersitsisumit tunniunneqassapput, tunniunneqannginnerinilu betonngitai, marraasersuinerit, kikissat, qinnerit, qalequt assigisaallu piiarsimanissaat kiisalu qalipaataatsitassamik oqimaatsumik akoqannginnissaa qulakkeeqqaassallugit. Qisuit eqqagassat tunniutinnginnerini 2 meterinit takinerutinnagit aserorterneqqaassapput.

Imaatigut angallassissutit qamutillu motorillit nutaanngilivallaarsimasut

§ 36. Eqqakkat immikkoortuni imaatigut assartuussinissamut angallatit, matumani umiatsiat, umiarsuit, umiatsiaaqqat aammalu umiaasaqqat kiisalu nunakkut assartuussinissamut qamutit, matumani biilit, qamuteralaat ATV-llu pineqarput.

Imm. 2. Eqqagassaqalersitsisup tunniussinnginnermi kommunimi avatangiisinut tunngatillugu malittarisassat naapertorlugit imaatigut angallassissutit imaluunniit qamutit motorillit avatangiisinut tunngatillugu isumannaarsimanissaat qulakkeerneqassapput. Avatangiisitigut piareersarneqarsimanngippata tigujumaneqassanngillat imaluunniit eqqagassaqalersitsisoq akigititanut allattorsimaffik naapertorlugu piffissaq atorneqartoq aallaavigalugu annertunerusumik akiligassinneqassaaq.

Imm. 3. Imaatigut angallassissutit imaluunniit qamutit avatangiisitigut piareersarneqarsimasut eqqagassaqalersitsisumit kommunip tigooraavianut tunniussissaaq, tassunnga atatillugu avatangiisitigut piareersarneqarsimaneranik uppersaammik takutitsisoqassalluni. Nunaqarfinni illoqarfimmut qaninnerpaamut tigooraavimmut tunniussineq ingerlanneqassaaq. Annertunerusumik aserorterneqarnissaanut piumasaqaateqartoqarsinnaavoq.

Imm. 4. Imaatigut angallassissutinik imaluunniit qamutit nutaanngilivallaartut avatangiisinut navianartunik atortoqaraluarpata atortoqanngikkaluarpataluunniit, illoqarfimmi pinngortitamullu qimaanneqarnissaat inerteqqutaavoq.

Kapitali 7

Eqqagassat immikkoortortat erseqqissumik innersuussinnermut ilaapput

Eqqakkat Asbestitallit

§ 37. Eqqakkat immikkoortortanut eqqagassat asbestitallit suulluunniit ilaapput, ilaatigut qaliami, natermi, silaannarissarfiit aqquataanni, cementinik ruujorini, marraasersuutini aammalu qeqoq qarmamut qalliutini kiisalu iikkersuutini qilaamullu qalliutini nassaassaasarlutik.

Imm. 2. Sanaartukkanik atortulersuutinillu 1950-1977-ip nalaanni sanaartugaasunik, 200 m²-mit annertunerusunik imaluunniit 10 tons sinnerlugu annertunerusunik eqqakkanik pilersitsiviusunik isaterinnginnermi imaluunniit nutarterinnginnermi, eqqagassaqaalersitsisoq eqqakkanik passussinissamut pilersaarummik imaqtartumik suliaqarnissamut kommunalbestyrelsimut attaveqassaaq.

Imm. 3. Tigooraavimmut innersuunneqartunut eqqagassaqaalersitsisoq tunniussinnginnermi, suulluunniit asbestimik akullit isugutatsillugit toqqortaritinneqarnissaat kiisalu ussissumik matoqqasumik aammalu asbestimik akulimmik imaqarneranik ersarissumik nalunaaqqutsersimasumik poortorneqarsimanissai qulakkiissavaa.

Imm. 4. Isaterinerup imaluunniit nutarterinerup naammassinerata kingorna, eqqakkat eqqagassalerinnermut pilersaarut akuersissutigineqartoq naapertorlugu ingerlatsisoqarsimaneranut uppernarsaatinik eqqagassaqaalersitsisoq kommunalbestyrelsimut nassiussissaaq.

Issoq mingutsinneqarsimasoq

§ 38. Eqqakkat immikkoortuni issaq avatangiisinut imaluunniit peqqissutsimut navianartunik akulik, avatangiisinik mingutsitsisinaasutut imaluunniit innuttaasut peqqissusaannut aarlerinartortaqaarneranik takussutissartalik ilaavoq.

Imm. 2. Issaq mingutsinneqarsimasup nuunneqarnera eqqagassaqaalersitsisumit kommunalbestyrelsimut, igitsinissamik periusissamik innersuussuteqartumut nalunaarutiginnissaaq. Igitsinissamik periusissamik innersuussisoqartinnagu issaq mingutsinneqarsimasoq iginneqassanngilaq.

Imm. 3. Tunniussinnginnermi issaq ujaraajaqqaarneqassaaq.

Imm. 4. Tigussaasumik itigartitsineq naapertorlugu eqqagassaqaalersitsisumit issaq mingunnikoq igissavaa. Akigititat atuuttut naapertorlugit eqqagassaqaalersitsisoq issumik mingunnikumik tunniussinnerminut akiliuteqassaaq.

Eqqakkat PCB-mik akullit

§ 39. Eqqakkat immikkoortumi eqqakkat PCB-mik akullit tamarmik pineqarput, taakkulu amerlanertigut marraasersuutini tasisaartuni, sininik matussusiisunik aammalu igalaat iluneq

ajortunut marraasersuutini, qalipaatin assigiinngitsuni, ini masattuleriffinni ussissaatini, naternut marraasersuutini aammalu oqorsaait uuliaanni nassaassaarlutik.

Imm. 2. Sanaartukkanik atortulersuutinillu 1950-1977-ip nalaanni sanaartugaasunik, 200 m²-mit annertunerusunik imaluunniit 10 tons sinnerlugu annertunerusunik eqqakkanik pilersitsiviusunik isaterinnginnermi imaluunniit nutarterinnginnermi, eqqagassaqaalersitsisoq eqqakkanik passussinissamut pilersaarummik imaqtumik suliaqarnissamut kommunalbestyrelsimut attaveqassaaq aamma isaterinerup imaluunniit nutarterinerup naammassinerata kingorna, eqqakkat eqqagassalerinermut pilersaarut akuersissutigineqartoq naapertorlugu ingerlatsisoqarsimaneranut uppersaatinik kommunalbestyrelsimut nassiussissaaq.

Imm. 3. Sanaartukkanut 200 m² mikinerusunut aammalu ilaqutariit ataatsit marlulluunniit illuini PCB-mik akoqarsinnaasut pingaarnerit eqqakkatut navianartutut passunneqassapput iginneqarlutillu.

Imm. 4. Eqqagassaqaalersitsisup tigooraavimmuut innersuunneqartumut tunniussinnginnermi qulakkiissavaa eqqakkat PCB-nik akullit pujoralannut ussittumut matoqqasumullu erseqqissumik PCB-mik nalunaaqutsersimasumut poorsimanissaat, aamma eqqakkanut allanut navianartunut imaluunniit naviananngitsunut akuliutinnginnissaat imaluunniit kimikillitinnginnissaat.

Imm. 5. Eqqagassaqaalersitsisut namminneerlutik eqqakkat PCB-mik akullit nunamut allamut arortigassanngorlugit nassiussinissaannut kommunalbestyrelsi akuersissuteqarsinnaavoq. Tassunga atatillugu eqqortumik isumaginninnissamut poortuinissamullu eqqagassaqaalersitsisoq nammineq akisussaasuvoq.

Issumi PCB

§ 40. Isaterinermi imaluunniit annertuumik nutarterinermi, illup silataanut qalipaatin PCB-mik 50mg/kg-mit annertunerusumik akullit imaluunniit silatimikkut marraasersuutit PCB-mik 1.000 mg/kg-mit annertunerusumik atuisoqarsimatillugu illuutit sanaartukkalluunniit eqqaani nuna eqqagassaqaalersitsisumit misissorneqassaaq.

Imm. 2. Eqqakkat PCB-nik akoqarnerat paasineqarpat kommunalbestyrelsi sukumiinerusumik paasissutissinneqarnissamut aamma eqqakkat pillugit innersuunneqarnissamut atatillugu saaffigineqassaaq.

Eqqakkat aatsitassanik oqimaatsunik akullit

§ 41. Eqqakkanut immikkoortunut eqqakkat aatsitassanik oqimaatsunik sunilluunniit akullit tamarmik pineqarput, matumani Aqerloq saffigassatut pissusilik, Arsen, Cadmium, Kromi, Kannugussaq, Kviksølvi, Nikkeli aamma Zinki assersuutigalugu qalipaatinut, cementimut, qalliutinut, qisunnut asiunaveersaasikkanut imaluunniit qinngornernut illersuutissanut atorqeersimasut ilaapput.

Imm. 2. Eqqakkat aatsitassanik oqimaatsunik akoqarnerat paasineqarpat kommunalbestyrelsi sukumiinerusumik paasissutissinneqarnissamut aamma eqqakkat pillugit innersuunneqarnissamut

atatillugu saaffigineqassaaq Illuutini 1. januar 2005 sioqqullugu sanaartugaasunik ingutserisussanik imaluunniit nutarterisussanik eqqagassaqaalersitsisunut aaqqiissut pingaarnertut tunngassuteqarpoq.

Kapitali 8

Akitsuutit

§ 42. Katersisarnermut aammalu innersuussinissamut aaqqiissutitut ataasiakkaanut eqqagassalerinermut atatillugu kommunimit aningaasartuutigineqartunik matussusissussanik kommunalbestyrelsi akiliutissanik aalajangersaassaaq. Akiliutit ukiumut naleqqussarneqartarput eqqagassalerinermullu Qeqqata Kommuniani akigititanut allattorsimaffimmi, kommunip nittartagaani tamanit takuneqarsinnaasuni takuneqarsinnaasarlutik.

Imm. 2. Eqqakkat illoqarfimmi, nunaqarfimmi nunap timaaniluunniit pilersinneqaraluarpata eqqagassaqaalersitsisut tamarmik akiliuteqartassapput.

Imm. 3. Eqqakkanut nalinginnaasunut tunngatillugu eqqagassaqaalersitsisoq nuunnermi imaartittarnissamut nalunaassaaq aammalu nooqqinnermi aaqqiissutip atorunnaarsinnissaanut nalunaqqissalluni. Nalunaarnerit kommunip nittartagaani ingerlanneqassapput. Nuunnermi atorunnaarsitsinissamik nalunaartoqanngippat, eqqagassaqaalersitsup allap nalunaarnissaata tungaanut eqqagassaqaalersitsisugallartutut nalunaqqasoq akiliisussaatitaavoq.

Imm. 4. Eqqakkat eqqortumik immikkoortiterneqarsimanngippata, akit allattorsimaffiat atuuttoq naapertorlugu kukkusumik immikkoortiterinermi akiliuteqartitsisoqassaaq.

Imm. 5. Imaatigut angallassissutit qamutillu motoorillit tunniunneqarnerini avatangiisinut piareersarneqarsimanngippata, piareersaarnermut aningaasartuutit matussuserneqarnissaannut akitsuuteqartinneqassapput.

Kapitali 9

Nakkutilliineq

§ 43. Qeqqata Kommuniani Teknikkimut Avatangiisinullu immikkoortortaqarfik nakkutilliisussaatitaasuvoq.

Imm. 2. Nakkutilliisussaatitaasoq avatangiisit pillugit inatsimmi § 47 naapertorlugu suliffeqarfimmik eqqagassalerisunik nakkutilliiartornissaq siunertarlugu suliffeqarfimmut appakaannissaminut, appakaannginnermi piffissaq sioqqullugu eqqagassaqaalersitsisumik kalerrisaareqqaassaaq.

Kapitali 10

Naammagittaalliutit

§ 44. Matumani maleruaqqusat naapertorlugit aalajangiinernut naammagittaalliutit uunga nassiunneqassapput Qeqqata Kommunia, Teknikkeqarnermut Avatangiisinullu immikkoortortaq, e-mail qeqqata@qeqqata.gl-ikkut imaluunniit allakkatigut.

§ 45. Kommunalbestyrelsip aalajangiineri avatangiisit pillugit Inatsisartut inatsisaanni kapitali 14-mi Avatangiisinik illersuineq pillugu malittarisassat naapertorlugit Naammagittaalliuuteqartarfimmut naammagittaalliuutigineqarsinnaapput.

Kapitali 11

Kinguneqartitsinerit

§ 46. Kalaallit Nunaanni pinerluttuleringeq pillugu inatsimmi malittarisassat naapertorlugit akiliisitsinikkut eqqagassaqaalersitsisumut pineqaatissiisoqarsinnaavoq:

- 1) § 5, imm. 1, aamma § 9, imm. 1-mi eqqakkanik immikkoortiterinissamut imaluunniit uninngasuuteqarnissamut piumasaqaatinik malinninngitsoq.
- 2) § 18, imm. 2, § 20, imm. 1 aamma 2 § 21, imm. 3, § 22, imm. 2 imaluunniit § 23, imm. 3-mi katersuinissamut aaqqiissutitut aalajangersakkanik malinninngitsoq
- 3) § 24, imm. 2, 1. pkt., § 25, imm. 2, § 26, imm. 2, § 27, imm. 2, § 28, imm. 2, 30, imm. 2, § 31, imm. 3 aamma 4, § 32, imm. 2, § 33, imm. 2, § 34, imm. 2 imaluunniit § 35, imm. 3-mi innersuussinissamut aaqqiissutitut aalajangersakkanik malinninngitsoq.
- 4) § 37, imm. 2 - 4, § 38, imm. 2 - 4, § 39, imm. 2 - 4, § 40, imm. 1 aamma 41, imm. 2-mi igitassinissamut aaqqiissutitut tigussaasumik innersuussinermi piumasaqaatinik malinninngitsoq.

Kapitali 12

Atuutilersitsinermut atorunnaarsitsinermullu aalajangersakkat

§ 47. Malittarisassat uku ulloq 1. september 2025-mi atuutilersinneqarput.

Imm. 2. Tamatuma saniatigut Sisimiut Kommuniani igitassanik eqqaanermut maleruaqqusaq 6. februar 1996-imeersoq, Sisimiuni, Sarfannguani Itillimilu eqqagassalerinermut malittarisassiat 6. februar 1996-imeersoq aammalu Sisimiut Kommuniani uuliakunik akuutissanillu eqqakkat iginneqarnissaannut maleruaqqusaq 6. februar 1996-imeersoq atorunnaarsinneqassapput.

Taamaalilluni Qeqqata Kommuniani kommunalbestyrelsianit ulloq 26.6.2025 akuerineqarpoq.



Malik Berthelsen
Borgmester

Taamaalilluni angerlarsimaffinni inoqutigiinnit Qeqqata Kommuniani eqqakkanut maleruaqqusaq
atuuttussanngortinneqarpoq

Namminersorlutik Oqartussat, ulloq 4. Juli 2025



Bentlaraq Ottosen

Isumaginninnermut, Suliffeqarnermut, Nunamullu Namminermut Avatangiisinullu Naalakkersuisoq